



DIKELUARKAN OLEH JABATAN MUFTI PERLIS

KENIKMATAN SYURGA YANG DIJANJIKAN

(TEKS KHUTBAH JUMAAT 3 MAC 2023)

KENIKMATAN SYURGA YANG DIJANJIKAN

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ وَنَعُوذُ بِاللَّهِ مِنْ شُرُورِ أَنْفُسِنَا وَمِنْ
سَيِّئَاتِ أَعْمَالِنَا، مَنْ يَهْدِهِ اللَّهُ فَلَا مُضِلَّ لَهُ وَمَنْ يُضِلَّهُ فَلَا هَادِيَ لَهُ،
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ
وَرَسُولُهُ. اللَّهُمَّ صَلِّ وَسَلِّمْ عَلَى مُحَمَّدٍ وَعَلَى آلِهِ وَأَصْحَابِهِ وَمَنْ تَبِعَهُمْ
بِإِحْسَانٍ إِلَى يَوْمِ الدِّينِ. يَا أَيُّهَا الَّذِينَ آمَنُوا اتَّقُوا اللَّهَ حَقَّ تَقَاتِهِ وَلَا تَمُوتُنَّ
إِلَّا وَأَنْتُمْ مُسْلِمُونَ. أَمَّا بَعْدُ، فَإِنَّ أَصْدَقَ الْحَدِيثِ كِتَابُ اللَّهِ، وَخَيْرَ الْهُدَى
هُدَى مُحَمَّدٍ صَلَّى اللَّهُ عَلَيْهِ وَسَلَّمَ، وَشَرُّ الْأُمُورِ مُحَدَّثَاتُهَا، وَكُلُّ مُحَدَّثَةٍ
بِدْعَةٌ، وَكُلُّ بَدْعَةٍ ضَلَالَةٌ، وَكُلُّ ضَلَالَةٍ فِي النَّارِ.

Sidang Jumaat Yang Berbahagia,

Marilah sama-sama kita bertakwa kepada Allah SWT, dengan mentaati segala titah perintahnya dan meninggalkan segala larangannya, kita bersyukur kepada Allah SWT kerana kita dapat hidup dengan aman dan damai. Mudah-mudahan dengan nikmat tersebut kita dapat melaksanakan ibadat kepada Allah serta menjadi seorang mukmin yang berjaya di dunia dan di hari akhirat kelak. Tajuk khutbah kita pada hari ini ialah; **“KENIKMATAN SYURGA YANG DIJANJIKAN”**.

Sidang Jumaat Yang Dikasihi Allah Sekalian,

Syurga adalah tempat yang dipenuhi dengan segala kenikmatan yang dijanjikan dan disediakan oleh Allah SWT untuk para hambaNya yang beriman, yang mengerjakan segala amal soleh dan meninggalkan segala larangannya. Kenikmatan yang terdapat di dalam syurga adalah sesuatu yang tidak pernah dilihat oleh mata, tidak pernah didengar oleh telinga, tidak pernah terlintas oleh hati dan tidak pernah terbayang oleh akal fikiran. Rasulullah SAW bersabda:

قَالَ اللَّهُ تَبَارَكَ وَتَعَالَى أَعَدَدْتُ لِعِبَادِي الصَّالِحِينَ مَا لَا عَيْنٌ رَأَتْ وَلَا أُذُنٌ
سَمِعَتْ وَلَا خَطَرَ عَلَى قَلْبِ بَشَرٍ قَالَ أَبُو هُرَيْرَةَ اقْرَءُوا إِن شِئْتُمْ { فَلَا تَعْلَمُ
نَفْسٌ مَا أُخْفِيَ لَهُمْ مِنْ قُرَّةِ أَعْيُنٍ }

Maksudnya; Allah SWT berfirman: “Aku menyiapkan untuk hamba-hamba-Ku yang soleh apa-apa yang belum pernah dilihat oleh mata, didengar oleh telinga dan belum pernah terlintas dalam benak manusia. Oleh kerana itu bacalah kamu ayat: ‘Seorang pun tidak mengetahui apa yang disembunyikan untuk mereka yaitu (bermacam-macam nikmat) yang menyedapkan pandangan mata sebagai balasan terhadap apa yang telah mereka kerjakan’”. Surah As-Sajdah, ayat 17. (Hadis Riwayat Al- Bukhari)

Dan daripada Anas bin Malik RA, Rasulullah SAW bersabda, ertinya: “**Seseorang yang paling senang hidupnya di dunia daripada ahli neraka dibawa pada hari Kiamat lalu dicelup ke dalam neraka. Kemudian dikatakan kepadanya: Wahai anak Adam. Adakah engkau pernah melihat sebarang kesenangan?. Adakah kenikmatan pernah muncul dalam hidup engkau?. Orang itu menjawab: Tidak, demi Allah, wahai tuhanku. Dibawakan pula seseorang yang paling susah hidupnya di dunia daripada ahli syurga, lalu dicelup ke dalam syurga. Lalu ditanya kepada beliau: Wahai anak Adam. Adakah engkau pernah melihat sebarang kesusahan?. Adakah kesusahan pernah muncul dalam hidup engkau?. Dia menjawab: Tidak, demi Allah, wahai tuhan ku. Tidak pernah kesusahan muncul dalam hidup ku dan tidak pernah aku melihat sebarang kesusahan**”.(Hadis Riwayat Muslim).

Itulah hakikat syurga dan neraka. Hanya sekali celupan dalam neraka, kita akan lupa segala nikmat yang pernah kita rasai di dunia. Sekali celupan dalam syurga, terus hilang segala rasa kesusahan yang pernah dialami di dunia. Manusia yang bijak akan memilih kenikmatan syurga yang lebih besar daripada nikmat dunia. Manusia yang bijak akan menjauhkan diri daripada kesusahan neraka yang lebih dahsyat daripada kesusahan dunia.

Sidang Jumaat Yang Di Muliakan,

Terdapat banyak dalil-dalil dari sumber Al-Quran dan Hadis yang menyebut tentang nikmat-nikmat yang diperolehi oleh ahli syurga, antaranya ialah;

Pertama; Syurga yang bakal didiami oleh para penghuninya amatlah luas. Seluas langit-langit dan bumi, sepertimana Allah SWT berfirman dalam surah Al-Hadid ayat 21 :

سَابِقُوا إِلَىٰ مَغْفِرَةٍ مِّن رَّبِّكُمْ وَجَنَّةٍ عَرْضُهَا كَعَرْضِ السَّمَاءِ وَالْأَرْضِ أُعِدَّتْ لِلَّذِينَ
 ءَامَنُوا بِاللَّهِ وَرُسُلِهِ ۚ

Maksudnya; *"Berlumba-lumbalah kamu (mengerjakan amal-amal yang baik) untuk mendapat keampunan dari tuhan kamu, dan mendapat syurga yang bidangnya seluas segala langit dan bumi, yang disediakan bagi orang-orang yang beriman kepada Allah dan Rasul-rasulNya"*.

Kedua; Syurga bukan sahaja luas, tetapi binaan dan segala perhiasan di dalamnya terdiri daripada Emas, Perak, Permata, Mutiara Zamrud, wangian minyak kasturi, za'faran, dan segala perkara yang menyukakan hati dan pandangan mata, para penghuninya pula sentiasa muda buat selama-lamanya.

فُلْنَا الْجَنَّةَ مَا بَنَّاوَهَا قَالَ لِبْنَةٌ مِنْ لِبْنَةٍ مِنْ ذَهَبٍ وَمِمَّا لَطُهَا الْمِسْكُ الْأَذْفَرُ
 وَحَصْبًا وَهِيَ اللَّوْلُؤُ وَالْيَاقُوتُ وَتُرْبَتُهَا الرَّعْفَرَانُ مَنْ دَخَلَهَا يَنْعَمُ لَا يَبْأَسُ وَيَخْلُدُ
 لَا يَمُوتُ لَا تَبْلَى ثِيَابُهُمْ وَلَا يَفْنَى شَبَابُهُمْ

Maksudnya; *"Kami (para sahabat Radiyallahuanhum) bertanya: "Syurga itu , binaanya (diperbuat) daripada apa?" Beliau (Nabi SAW) menjawab: " (Diperbuat daripada) batu bata dari perak dan emas, tanah liatnya dari minyak kasturi yang harum, batu kerikilnya dari mutiara dan permata, debu (tanahnya) dari za'faran, barangsiapa memasukinya, ia bersenang-senang (didalamnya) dengan tidak merasa jemu, (hidup) kekal (didalamnya), tidak mati, pakaian-pakaian mereka (yang cantik) tidak (akan menjadi) lusuh, mereka sentiasa muda, tidak dimamah (usia)". (Hadis Sahih, Riwayat Al-tirmizi)*

Sidang Jumaat Yang Dikasihi Sekalian,

Yang Ketiga; Suasana di dalam syurga dan tempat berehatnya amatlah cantik, selesa, nyaman, tenang, tidak panas membakar dan tidak pula sejuk menggigil, sepertimana Allah SWT berfirman;

مُتَّكِنِينَ فِيهَا عَلَى الْأَرْوَاقِ لَا يَرَوْنَ فِيهَا شَمْسًا وَلَا زَمَهْرِيرًا ۖ

Maksudnya; *"Mereka berehat di dalam syurga dengan berbaring di atas pelamin-pelamin (yang berhias), mereka tidak nampak di situ adanya matahari (usahakan hawa panasnya), dan tidak juga merasai suasana yang terlampau sejuk". (Surah Al-Insan, ayat 13)*

Keempat; Terdapatnya sungai-sungai yang indah, luarbiasa di syurga dan amat jauh bandingannya dengan sungai-sungai yang indah di dunia ini. Sungai di syurga terdiri

daripada sungai susu, madu yang bersih, segar, lezat yang tidak berubah rasa dan baunya. Kekal selama-selamanya. Tiada hujan, panas dan segala perkara yang boleh mengurangkan rasa nikmatnya minuman di syurga. Ada pula sungai-sungai yang berisi dari arak yang begitu lezat, yang tidak memabukkan seperti mana di dunia hari ini. Segalanya tak dapat nak dibayangkan, cukuplah kepercayaan, keyakinan kita akan benarnya janji-janji Allah SWT sebagaimana telah dijelaskan dalam FirmanNya :

مَثَلُ الْجَنَّةِ الَّتِي وَعَدَ الْمُتَّقُونَ فِيهَا أَنْهَارٌ مِنْ مَاءٍ غَيْرِ آسِنٍ وَأَنْهَارٌ مِنْ لَبَنٍ لَمْ يَتَغَيَّرَ طَعْمُهُ وَأَنْهَارٌ مِنْ حَمْرٍ لَذَّةٍ لِلشَّارِبِينَ وَأَنْهَارٌ مِنْ عَسَلٍ مُصَفًّى وَهُمْ فِيهَا مِنْ كُلِّ الثَّمَرَاتِ وَمَغْفِرَةٌ مِنْ رَبِّهِمْ

Maksudnya; *Sifat syurga yang telah dijanjikan kepada orang-orang yang bertaqwa (ialah seperti berikut): ada padanya beberapa sungai dari air yang tidak berubah (rasa dan baunya), dan beberapa sungai dari susu yang tidak berubah rasanya, serta beberapa sungai dari arak yang lezat bagi orang-orang yang meminumnya, dan juga beberapa sungai dari madu yang suci bersih. dan ada pula untuk mereka di sana segala jenis buah-buahan, serta keredaan dari tuhan mereka.* (Surah Muhammad, ayat 15)

Sidang Jumaat Yang Dikasihi Sekalian,

Yang Kelima; Dianugerahkan pula buat ahli syurga pasangan yang cantik lagi sempurna rupa parasnya, tingkah lakunya serta akhlakunya, iaitu bidadari-bidadari yang telah dijadikan khas oleh Allah SWT buat mereka. Kecantikan, kesucian, keayuannya tidak dapat dikhayalkan atau digambarkan hakikatnya yang sebenar oleh akal fikiran. Sepertimana Allah SWT berfirman;

فِيهِنَّ خَيْرَاتٌ حِسَانٌ ﴿٧٠﴾ فَبِأَيِّ آءِ الْآءِ رَبِّكُمْ تُكَذِّبَانِ ﴿٧١﴾ حُورٌ مَقْصُورَاتٌ فِي الْحِيَامِ ﴿٧٢﴾ فَبِأَيِّ آءِ الْآءِ رَبِّكُمْ تُكَذِّبَانِ ﴿٧٣﴾ لَمْ يَطْمِثْهُنَّ إِنْسٌ قَبْلَهُمْ وَلَا جَانٌ ﴿٧٤﴾

Maksudnya: *“Dalam kedua-dua syurga itu juga terdapat (teman-teman) yang baik akhlakunya, lagi cantik parasnya; maka yang mana satu di antara nikmat-nikmat tuhan kamu, yang kamu hendak dustakan?, iaitu bidadari-bidadari, yang hanya tinggal tetap di tempat tinggal masing-masing; maka yang mana satu di antara nikmat-nikmat tuhan kamu, yang kamu hendak dustakan? (bidadari-bidadari itu) tidak pernah disentuh sebelum mereka oleh manusia dan tidak juga oleh jin”.* (Surah Ar Rahman, Ayat 70-74)

Dan Rasulullah SAW bersabda:

وَلَوْ أَنَّ امْرَأَةً مِنْ نِسَاءِ أَهْلِ الْجَنَّةِ اطَّلَعَتْ إِلَى الْأَرْضِ لِأَضَاءَتِ مَا بَيْنَهُمَا
وَلَمَلَأَتْ مَا بَيْنَهُمَا رِيحًا وَلَنْصِيفُهَا يَعْنِي الْخِمَارَ خَيْرٌ مِنَ الدُّنْيَا وَمَا فِيهَا

Maksudnya:”*Dan jikalau ada salah (seorang) daripada bidadari syurga muncul diatas muka bumi ini, nescaya akan menerangi apa yang ada diantara keduanya (yaitu syurga dan bumi), dan akan memenuhi kedua-duanya (yaitu syurga dan bumi ini) dengan kewangiannya, dan tudung (penutup kepala bidadari) lebih baik daripada dunia dan segala isinya*”. (Hadis Riwayat Al-Bukhari)

Keenam; Seterusnya nikmat yang paling terbesar, bakal diperolehi oleh para penghuni syurga ialah, dapat melihat Allah SWT, sepertimana Allah SWT berfirman dalam Surah Al-Qiyaamah ayat 22-23:

وَجُوهٌ يَوْمَئِذٍ نَاضِرَةٌ ﴿٢٢﴾ إِلَىٰ رَبِّهَا نَاظِرَةٌ ﴿٢٣﴾

Maksudnya:”*Pada hari akhirat itu, muka (orang-orang yang beriman) berseri-seri, melihat kepada tuhannya*”.

Dan Nabi SAW bersabda;

فَيَكْشِفُ الْحِجَابَ فَمَا أُعْطُوا شَيْئًا أَحَبَّ إِلَيْهِمْ مِنَ النَّظَرِ إِلَىٰ رَبِّهِمْ عَزَّ وَجَلَّ

Maksudnya:”*Maka, pada waktu itu Allah membuka hijab (yang menutupi wajahNya Yang Maha Mulia) dan penghuni syurga tidak pernah mendapatkan suatu (kenikmatan) yang lebih mereka sukai daripada melihat (wajah) Allah*”.(Hadis Riwayat Muslim)

Sidang Jumaat Yang Dikasihi Allah Sekalian,

Di dunia ini kita berusaha dengan bermacam-macam cara untuk mendapatkan nikmat yang sedikit. Manusia sanggup berhutang dan berkerja keras untuk mendapatkan rumah dan kereta untuk kehidupan. Padahal itu semua sangat sedikit nikmatnya dan sementara. Hendaklah kita rajin berusaha dengan lebih bersungguh-sungguh untuk mendapatkan syurga yang serba nikmat dan kekal. Untuk mendapatkan syurga tidak perlu bersaing atau merayu kepada orang lain. Tiada siapa boleh memintas peluang kita. Ia hanya antara kita dengan Allah SWT pencipta kita.

Inilah diantara nikmat-nikmat yang akan dimiliki oleh para penghuni syurga dan ini semua adalah nikmat-nikmat yang berkekalan, kekal abadi buat selama-lamanya, sepertimana yang dikhabarkan oleh Allah SWT melalui lisan baginda Rasulullah SAW. Oleh itu, dikesempatan hidup ini, marilah sama-sama kita manfaatkan peluang yang ada ini untuk menjadi hambanya yang melaksanakan segala suruhannya dan meninggalkan segala larangannya, dan banyak berdoa kepadanya supaya dimasukkan ke dalam syurganya, mudah-mudahan dengan kita bersungguh-sungguh melakukan

ketaatan kepadanya dan banyak berdoa, akan menjadi sebab musabab kita semua dipilih oleh Allah SWT sebagai calon penghuni syurga dan dikurniakan kenikmatan tersebut di hari akhirat kelak. Allah SWT berfirman dalam surah Ali 'Imran ayat 133:

﴿ وَسَارِعُوا إِلَىٰ مَغْفِرَةٍ مِّن رَّبِّكُمْ وَجَنَّةٍ عَرْضُهَا السَّمَوَاتُ وَالْأَرْضُ أُعِدَّتْ لِلْمُتَّقِينَ ﴾



Maksudnya: **“Dan segeralah kamu kepada (mengerjakan amal-amal yang baik untuk mendapat) keampunan dari tuhan kamu, dan (mendapat) syurga yang bidangnya seluas segala langit dan bumi, yang disediakan bagi orang-orang yang bertaqwa”.**

Dan Rasulullah SAW bersabda;

فَإِذَا سَأَلْتُمُ اللَّهَ فَسَلُّوهُ الْفِرْدَوْسَ فَإِنَّهُ أَوْسَطُ الْجَنَّةِ وَأَعْلَى الْجَنَّةِ وَفَوْقَهُ عَرْشُ الرَّحْمَنِ وَمِنْهُ تَفَجَّرُ أَنْهَارُ الْجَنَّةِ

Maksudnya: **“Maka Apabila kamu memohon syurga kepada Allah, maka mohonlah (syurga) al-Firdaus, sebab (syurga) firdaus adalah syurga yang paling tengah dan yang paling tinggi, di atasnya ada arsy (Allah) Arrahman, dan daripadanya terpancar sungai-sungai di syurga”.** (Riwayat Al-Bukhari)

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ.

KHUTBAH KEDUA

الْحَمْدُ لِلَّهِ الَّذِي أَنْزَلَ عَلَى عَبْدِهِ الْكِتَابَ وَمَمْ يُجْعَلْ لَهُ عِوَجًا. أَللَّهُمَّ صَلِّ وَسَلِّمْ وَبَارِكْ عَلَى مُحَمَّدٍ وَعَلَى آلِهِ وَصَحْبِهِ أَجْمَعِينَ، وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ. أَمَّا بَعْدُ، فَيَا أَيُّهَا الْمُسْلِمُونَ، اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Sidang Jumaat Yang Dikasihi Allah,

Ada satu surah di dalam al-quran, sekiranya kita selalu membacanya pada setiap malam sebelum tidur dan mengamalkannya, maka surah itu akan memberi syafaatnya kepada kita, dan diampunkan dosa-dosa kita, serta dapat menghalangi kita dari terkena azab seksaan di dalam kubur . Rasulullah SAW telah bersabda:

إِنَّ سُورَةَ مِنَ الْقُرْآنِ ثَلَاثُونَ آيَةً شَفَعَتْ لِرَجُلٍ حَتَّى غُفِرَ لَهُ وَهِيَ سُورَةُ تَبَارَكَ الَّذِي بِيَدِهِ الْمُلْكُ

Maksudnya: *“Sesungguhnya ada satu surah daripada al-Quran (yang jumlahnya) tiga puluh ayat, (surah ini akan memberi) syafaat untuk orang yang (membacanya serta mengamalkannya), sehingga diampunkan baginya (dosa-dosanya), dan dia (adalah) surah “al-Mulk”.* (Hadis Hasan, Riwayat at-Tirmizi)

Dan Abdullah bin Mas’ud RA, dia berkata:

مَنْ قَرَأَ { تَبَارَكَ الَّذِي بِيَدِهِ الْمُلْكُ } كُلَّ لَيْلَةٍ مَنَعَهُ اللَّهُ بِهَا مِنْ عَذَابِ الْقَبْرِ

Maksudnya: *“Barangsiapa yang membaca “Tabarokallazi bi yadihil mulk” (surah al-Mulk) pada setiap malam, maka Allah akan menghalanginya dari (terkena) azab seksaan kubur”.* (Riwayat Al-Nasai, Hasan)

Oleh itu, hendaklah kita jadikan surah Al-mulk ini sebagai amalan bacaan harian kita pada setiap malam sebelum tidur, sepertimana yang dianjurkan oleh baginda Rasulullah SAW kepada kita. Mudah-mudahan kita memperolehi kelebihan dari surah yang mulia ini.

Sidang Jumaat Yang Dihormati Sekalian,

Sesungguhnya, Allah SWT berfirman dalam surah Al-Ahzab ayat 56:

إِنَّ اللَّهَ، وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا

تَسْلِيمًا ﴿١٥٦﴾

Maksudnya: *Sesungguhnya Allah dan para malaikat berselawat ke atas Nabi, maka wahai orang-orang yang beriman hendaklah kamu berselawat dan salam ke atas Nabi.*

اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ
إِبْرَاهِيمَ وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ
إِبْرَاهِيمَ فِي الْعَالَمِينَ إِنَّكَ حَمِيدٌ مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ
وَالْمُؤْمِنِينَ وَالْمُؤْمِنَاتِ، الْأَحْيَاءِ مِنْهُمْ وَالْأَمْوَاتِ. إِنَّكَ سَمِيعٌ قَرِيبٌ مُجِيبُ
الدَّعَوَاتِ وَقَاضِي الْحَاجَاتِ.

Ya Allah! Ampunilah seluruh kaum muslimin sama ada yang hidup ataupun yang telah mati. Ya Allah! Berikan petunjuk hidayah serta rahmatMu kepada kami sekalian hamba-hambaMu dan kepada pemimpin kami terutamanya Raja pemerintah Negeri Perlis Tuanku Syed Sirajuddin Ibni Al-Marhum Tuanku Syed Putra Jamalullail dan Raja Muda Perlis Tuanku Syed Faizuddin Putra Ibni Tuanku Syed Sirajuddin Jamalullail serta kaum kerabat Baginda, supaya sentiasa beramal dengan kitabMu dan sunnah nabiMu Muhammad SAW, dan Engkau lanjutkanlah usia baginda berdua dalam keadaan selamat, sihat sejahtera dan semoga dengan kesihatan yang baik yang telah Engkau kurniakan kepada baginda berdua, terlaksanalah pemerintahan yang adil lagi diredhai olehMu.

Ya Rahman, Ya Rahim! Kami memohon kepadaMu dengan segala kerendahan diri sebagai hamba-Mu, Engkau indahkanlah akhlak kami. Engkau perbaikilah pergaulan antara kami. Engkau jadikanlah kami umat Islam yang bermentaliti kelas pertama dalam tindakan. Engkau peliharalah kami dari penyakit lemah, malas, berfikiran dangkal dan buruk budi pekerti.

Ya Allah! Engkau angkatlah martabat setiap hamba-Mu yang berpegang dengan Al-Quran dan sunnah Nabi-Mu. Berilah kekuatan kepada kami untuk menghindari amalan syirik, bid'ah, khurafat dan maksiat.

Ya Allah! Engkau limpahkan Negeri Perlis ini dengan keberkatan. Engkau bimbinglah kami penduduknya kepada kepada amalan soleh yang engkau redha. Penuhi jiwa kami dengan mencintai agama-Mu.

Ya Allah! Engkau jauhkanlah kami dari bala dan kerosakan. Engkau tambahkanlah nikmat-Mu kepada kami. Engkau berikanlah kepada kami kebahagiaan hidup di dunia dan di hari akhirat.

رَبَّنَا آتِنَا فِي الدُّنْيَا حَسَنَةً وَفِي الآخِرَةِ حَسَنَةً وَقِنَا عَذَابَ النَّارِ. وَصَلَّى اللهُ عَلَى
نَبِيِّنَا مُحَمَّدٍ وَالْحَمْدُ لِلَّهِ رَبِّ الْعَالَمِينَ. إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَاءِ ذِي
الْقُرْبَى وَيَنْهَى عَنِ الْفَحْشَاءِ وَالْمُنْكَرِ وَالْبَغْيِ، يَعِظُكُمْ لَعَلَّكُمْ تَذَكَّرُونَ.